

**Puisi**

**Siti Zaleha M. Hashim**

**Bulan Menghulur Tali  
Untuk Aku Berayun Naik**

2014

Bulan menghulur tali  
untuk aku berayun naik  
terima kasih sahabat  
aku tetap berdiri di sini  
biar ribut berputar liar  
tidak akan lari sembunyi  
sejarah yang singgah  
membekal keberanian  
mengajar erti pengorbanan

2022

Bulan menghulur tali  
untuk aku berayun naik  
tidak mungkin sahabat  
aku akan terus di sini  
berpijak di bumi berkat  
sama-sama mengubat  
jika jantung negara  
terbelah dan pecah.

*2024, Shah Alam*

**Terperangkap**

Jika kau terperangkap  
dalam rumah kaca  
tanya kalbu di mana pintu  
bagaimana cara ke sana  
nurani dapat membantu  
kau dekat dengan-Nya

Kehidupan keras dan deras  
membuat kau memijak-mijak  
siapa pun tanpa rasa belas  
rumah kaca mengajar  
agar lebih berhati-hati  
melihat ke dalam diri.

*2024, Shah Alam*

### **Berteduh Setelah Subuh**

Di manakah silapnya  
dibuang rumput liar  
sejak awal  
disiram air setiap hari  
biar segar  
dibawah sinar mentari.

Di manakah silapnya  
tidak tumbuh menjadi  
pohon yang subur  
tempat berteduh  
setelah subuh.

Wajah tua itu pasrah  
Tuhan mengatur  
segala yang tersembunyi.

*10 September 2024*  
*Shah Alam*

### **Biodata Penulis:**

#### **Siti Zaleha M. Hashim**

Siti Zaleha Bee Mohd. Hashim, penyair kelahiran Taiping, Perak pada 6 November 1953. Memperoleh Ijazah Sebaran Am (Penyiaran) Universiti Teknologi Mara (UiTM) (1976), Ijazah Sarjana (Komunikasi) University of Leeds, United Kingdom (1996) dan Ijazah Kehormat Doktor Persuratan, World Academy of Arts and Culture, USA (2013). Pernah berkhidmat di Dewan Bahasa dan Pustaka (DBP) (1978-2011) antaranya sebagai editor majalah. Penerima Hadiah Sasterawan Negeri Perak (2024), Hadiah Sastera Perdana Malaysia dan Hadiah Sastera Darul Ridzuan. Kumpulan puisinya adalah *Camar di Cangkir Bumi* (DBP, 1999, 2003), *Kristal di Laut Bulan* (DBP, 2006, 2019), *Kapal Kertas dan Lautan Api* (ITBM, 2012), dan *Masuk ke Dalam Awan* (DBP, 2019). Terkini beliau merupakan pembimbing bengkel pengacaraan dan pernah menerbitkan buku *Tips Menulis Teks Pengacara Majlis* (ITBM, 2013).